Sier Bertuzi Gabriel di sier Francesco, qu. sier Bertuzi el cavalier . . . 110. 94

E tutti tre li ditti Savii ai ordeni introno a di 27 in Colegio.

Noto. Fo scrito, per Colegio, a l'Orator nostro in corte sier Alvise Gradenigo, vogli interceder el Papa di haver uno perdon in la chiexia di Santa Maria di la Celestia.

379* A di 20. La matina, non fo alcuna letera da conto. Fu fato in Colegio, intervenendo li Cai di X, et mandati fuora li Cai di XL et Savii ai ordeni, però li tre non è intradi, è solo sier Hironimo Zane, non era sier Lodovico Michiel, fu fato Gastaldo a la Zecha, e rimase da Canal fradelo dil Secretario è in Franza con l'orator Justinian.

In questa matina, in Quarantia criminal, e fo il terzo Consejo, poi molte disputation, agitandosi di la vita di uno nominato . . . , qual amazò in leto uno a Santo Aponal et li tolse 600 ducati, et fo sententiato, venendo in le forze, sia menato per Canal e squartato. Hor in questa guerra, par sier Domenego Contarini provedador in campo li fesse un salvoconduto, è stà bon marchesco, e la sua persona fusse secura et tutta la sua roba, unde per questo li soi avochati lo difende. È stà preso a Verona, over in veronese et mandato de qui. L'altro zorno andò: 18 di procieder, 15 di no, 3 non sinceri; et li Avogadori tutti tre ha parlato contra di lui. A l'incontro, domino Thomaso Amachin dotor, sier Alvise Badoer avochato di presonieri, et ditto quello si poteva in so' favor. Hor questa matina iterum posto il procieder, fo 17 di si, 17 di no; sichè ha impatà. Mancò in Quarantia sier Piero Morexini qu. sier Lorenzo per esserli morta sua madre questa nocte, qual sentiva di justiciarlo et il salvoconduto non vagli; sichè si torà la Quarantia zivil vechia a judicarlo.

Item, expedite uno Zuan Francesco da Lucera, ditto el Frate, per haver condoto de qui monede forestiere false, che Sabato in mezo le do Colone li sia cavà uno ochio et in perpetuo bandito, ut supra; et essendo preso, li sia tajà una man, con taia lire 500, e rimandà al bando.

Da poi disnar, fo Consejo di X semplice, et expediteno uno Antonio samiter di Gregorio per monede false, bandito di Veniexia e dil destreto e dal Menzo e Quarner in qua per anni 10 con taia lire 500, e venendo in le forze, stia uno anno in la preson Forte et rimesso al bando.

Item, con la Zonta di Colegio, expediteno quel Hantbal Paleologo cyprioto, bandito di Cypro per

oal Paleologo cyprioto, bandito di Cypro pe I Diarii di M. Sanuto. — Tom. XXVIII. anni 10, per aver voluto dar di uno pugnal a sier Gabriel Corner, feva l'oficio dil Camerlengo, che li volse dar un schiafo; e questo è benemerito in quele guerre. Acusò uno padron Paulo Ungarelo, era a Rodi, voleva tratar di dar Cypro a li fioli fo di re Zacho, et li fo dato provision di ducati 200 a l'anno; hor fo tajà dita sententia.

Item, volseno expedir quelli è in prexon per monede, intervenendo lo episcopo di Candia Lando, che per il Papa fu assolto; ma fe leto il processo, è grande e non fo compito.

Di Franza, fo letere di tre Oratori, di 13. Di successi di quelli Reali, bancheti et zostre fate, come dirò in la copia di la letera.

Exemplum.

380

Copia di una letera dil conte Alexandro Donado, scrita a sier Zuan Francesco Griti qu. sier Hironimo, data in Ardres a di 13 Zugno 1520, recevuta a di 27 dito.

Domenica passata, fo a di 10 Zugno, la Maestà dil re di Franza andò a disnar a Gines con la Raina de Ingaltera, et il serenissimo re di Anglia andò a disnar con la raina di Franza; li bancheti furno superbissimi. Da poi che una parte et l'altra disnato ebbeno, soni, bali et canti, stando li francesi in feste con le done inglese, et cussì li inglesi con le francese, et maxime li do Re vestiti molto richamente de ori, soprarizi et belissime zoje. Lo apparato di la Majestà di Franza, si è, prima un grandissimo pavion con un fondamento grosso de quadreli alto da terra zercha 4 braza, et poi de taole depente a modo di quadrelli, alto circha 10 braza, de là in su forte alto coperto de pani azuri con zigli d'oro, de cætero ornato de razi con solari atorno et camere, et un tribunal conzo benissimo: questo è per festegiar dentro. Ma li pavioni è di grandeza come il campo di San Joanne Bragola et più, coperte ditte trabache de tela d'arzento et veluto paonazo rechamato d'oro a zigli atorno ditte trabache. E lì sono pavioni non troppo grandi coperti al ditto modo. Dentro ditte trabache ornate d'oro et di seta. In mezo li è uno gran pavione de alteza, a mio judizio, braza 10 vel zircha, tutto coperto de brocato d'oro; li pezi sono intriegi et sono cento; io li ho numerati; et cussi è fodrà de dentro con qualche peza de brochà d'arzento. In mezo de ditto pavion ne sono uno altro coperto di dita sorte, de dentro fina al mezo fodrà de veluto paonazo re-